

嘉慶直隸太倉州志

直隸太倉州志卷第十

名宦

上

聖人養賢以及萬民陳殷置輔之中守牧令爲尤重史漢以來特立循吏以傳之爲民上者如保赤子視民如傷則被其德者無不飲食尸祝之或申上實蹟列祀名宦甚盛典也故書其既往用勸將來自明以來蘇州巡撫兩司道府政績卓然者甚衆今止就曾祀太倉名宦者紀之而知州有善必書其丞簿尉宋史謂皆佐縣政而學官尤有興起人才之責故因舊志詳載于篇終于武職志名宦

臺司

元

董搏霄字孟起藁城人性耿介剛明至正十三年海賊侵太倉立水軍都萬戶府鎮之搏霄由江浙行省參政任副萬戶事時方國珍引蘭秀山賊來寇搏霄督戰艦禦獲賊數百人梟首劉家港及半涇由是賊不敢犯祀名宦祠

明

吳楨定遠人洪武初以靖海侯開府太倉總督海運讀書好文士凡船塢兵庫公館諸廨皆其建置於婁民尤多惠愛

陳瑄字彥純合肥人永樂初以平江伯總督海漕禮賢

惠下人心翕服後建議鑿漕渠功尤偉軍民爲立祠一  
夏原吉字維詰湘陰人歷戶部侍郎永樂初兩浙大水  
奉命來視奏罷害政數十事布衣徒步訪水道導之入  
海奏發粟三十餘萬石活飢民甚衆時議水退淤肥宜  
召佃墾種以益國用原吉馳奏不宜重困吳民歿祀名  
宦祠

周忱字恂如吉水人宣德五年以工部侍郎巡撫南畿  
置水次倉受秋糧運外餘米以充夏稅又餘卽應百工  
務爲東南利成化初忱以太倉鎮海二衛同治一城請  
立學訓衛子弟太倉文教自忱始嘗渡海至崇明命通  
判王儀丈量沙塗畫圖勒石以息沙民爭據之弊題定

稅糧四萬餘石漲不得增坍不得減至今民賴之祀名宦遺惠兩祠

崔恭字克讓廣宗人天順初以副都御史巡撫應天務守周忱規制太倉有軍戶絕無賴子利其遺產自誣占籍御史郭某信之里中連坐配衛者二十四人列狀訴恭下有司覈實盡復爲民一方頌德祀名宦祠

王恕字貫宗三原人成化間以副都御史巡撫應天奏建太倉州治下蘇州府核報旋寢後卒如恕請祀名宦祠

朱瑄鄞縣人宏治間以副都御史巡撫應天請立州治疏陳六利詔可州初立凡營度多出瑄手廉節約儉勤

卹民隱咸感頌之祀名宦祠

艾璞官副都御史會大有亦官副憲竝巡撫江南張晏  
官巡按御史宏治十七年海寇施安鈕東山等作亂會  
駐太倉率舟師討平之竝祀名宦祠

蔡克廉號可泉□□人操江都御史嘉靖三十二年倭  
突薄太倉城時克廉駐蘇州星馳入城乘堞冒矢石督  
將士固守擊殺賊三十餘人乃遁去

周如斗字允文餘姚人蘇松巡按嘉靖三十三年倭寇  
崇明三沙時新築土城緩急難恃軍民聞警奔竄如斗  
亟請帑金四萬兩發以塹屹然保障流亡四集祀遺廉  
祠

唐順之號荆川常州人嘉靖八年進士以通政使家居三十八年夏值倭變奉勅巡視軍政躬督總兵劉憲兵備熊桴等與賊決戰士爭用命時民被虜者千餘人訊其情皆釋去又奏定海洋出哨以崇明爲七總兵會汛地特設都司駐劄防禦吳淞總兵官軍政得失題定崇明知縣填註議者避之

任環號復菴潞安人由進士任蘇州府同知嘉靖三十八年倭入寇環練民兵躬介冑策馬力戰遍體書姓名曰死綬職也先人遺體愛我者當不我棄也環治兵夜不解甲與士卒同寢食俸入悉以犒士士樂用命嘗與賊戰敗追幾及庖者徐珮手搏賊免環珮竟死旣以僉

事兵備太倉疽發閤賊至裏創出擊賊大敗俘斬甚衆已又敗之陰沙寶山南沙賊望環旌旗輒駭曰瘦官來或曰判命官至矣咸遁去三十九年賊犯蘇州民爭走入城門鎖不得入環亟命啟門活數十萬人明日以計敗賊於葑門明年復大敗賊進副使賜金綺予世蔭丁母憂起復環晝出治兵夜歸衰經終夜孺子泣明年倭平乞終制報可仍陞參政未幾以哀毀卒贈光祿卿

王儀字克敬霸州人嘉靖二年進士初知嘉定縣廉明勤幹邑苦徃役儀第九等令民量貲自占不以實者質衆論更之初下戶不編役者輸銀於官以供費歲久滋弊儀更其法酌役之輕重悉編使共之糧長苦漕卒橫



正書  
素輒又自多取於民儀令民入米務乾潔而兌不過什一民既稱便軍亦不敢譁其聽訟卽令投牒者攝所訟人立爲剖決或勸釋之三年賦平訟簡召入爲御史出知蘇州尋擢蘇松兵備副使行均田法尤爲民利終于右副都御史民祀之鍾樓

歐陽鐸字崇道泰和人嘉靖初巡撫應天時蘇郡田賦大壞豪右多欺隱詭寄糧輕者畝五升重者十五倍之鐸言蘇之田賦甲天下吾不能減額而能均之會蘇州知府王儀遷兵備副使議相合下屬邑清丈均科則賦以平太倉鐸石公所至今賴之

王道行字明甫陽曲人由蘇州知府遷蘇松兵備道副

使嘉靖中巡歷海洋調度戰艦簡選鄉兵次第就理又周視水利委官疏濬民稱便焉祀名宦祠

周魯字誠齋嘉靖三十七年以防海駐崇明安靜不擾會哨營船一遵法律

張雲鸞涇陽人蘇州府海防同知隆慶三年閏六月颶風大作洪潮丈餘人民溺死無算鸞承檄省賑請發粟二十九萬斛全活甚衆其駐崇明寓居學舍不異貧儒薛貞巡按蘇松萬歷中行部至崇明勘定竈產撥民二案賞罰嚴明人情讐服

倪元珙字賦如上虞人以御史爲江南學道時吳中盛文社太倉復社張溥主之四方雲集有爲蜚語告變下

臺司治元珙抗言諸士修名節講文藝無亂狀柄國者  
以爲黨謫光祿寺錄事

馮元颺字爾賡慈谿人崇禎八年以參議任蘇松兵備  
道抵任視行間積玩慨然曰我官何銜兵不備曷稱職  
乃選材官簡募技勇別設一營號中權增餉練武適京  
師戒嚴元颺聞命泣諭將士出師勤王皆感奮事解而  
回于是浚城濠置器械舉軍政復檄試四郡士兼策經  
濟拔其九子弟稱馮氏學性廉平吏事尤精敏詰盜片  
言可折財賦累萬運掌可會計會復社蜚語上聞事下  
臺司元颺同倪元珙力爲申辨觸權貴左調去瀕行官  
軍泣下士民擁車幾不前

黃希憲字又生口口人崇禎十三年巡撫江南時民困于役最重者爲白糧解戶家立破其次徵收地丁銀謂收頭民田十畝以上者皆不免希憲疏其害請以白糧委縣佐而收銀屬之吏重困盡釋民咸頌之

凌義渠字駿甫烏程人天啟五年進士歷禮戶兵三部給事中以例出爲福建右參政轉按察司副使移蘇松兵備道性廉約嚴肅務存大體陞山東右布政士民思之義渠在諫垣時江南亂民焚掠巨室疏言國家之所與立在名分紀綱日者發姦之令方嚴告密之門漸啟藩族強宗入京越奏里閭小故排闥聲寃甚至僕豎可以侮家長厮役可以箝本官市僧可以持紳衿盜賊可

以傲失主此春秋所爲六逆也上下之分決裂防維無  
復界限卽九重之上安所藉以提挈萬靈役使羣動後  
皆驗仕至大理寺卿甲申三月殉節死 國朝賜諡忠  
清

曹大衡巡撫江南崇禎中按臨崇明以法繩豪強使不  
得逞凡吏胥作奸者槩不少貸民害頓除

王璽字爾玉崇禎十四年海寇顧榮猖獗璽監軍崇明  
檄營將會哨並究從前失機諸弁置之法軍威赫然  
荆本徹字大徹丹陽人崇禎十四年進士監軍海上時  
崇明有家僕叛主之變本徹檄游擊魯之璵懲治之俗  
賴以安

國朝

秦世楨字瑞寰廣寧人順治八年以御史按吳中彈貪墨捕大蠹雪冤誣時漕卒驕橫每米石索加銀二三錢世楨奏立五米五銀法官給之著爲令

馬鳴佩奉天人順治十二年總督江南具幹濟才遇事精明果斷獎廉懲貪靖山巨寇釋善良之囚繫者

郎廷佐字一柱奉天人順治十三年由南贛巡撫陞兩江總督十六年鄭成功入寇廷佐督厲將士調遣有方令崇明總兵梁化鳳大破賊于得勝門外又嘗觀軍海上題設崇明水司官兵萬二千人海疆安堵

李森先字琳枝平度人崇禎十三年進士順治十三年

以御史按吳捕豪猾胥吏悉置諸法又舉孝子節婦以  
興民行時太倉劉河塞功鉅臺司莫敢任森先因士民  
請獨與知州白登明決策開濬功垂成以他事逮去父  
老執役者皆爲垂涕

蘇納海兵部尙書順治十八年巡視海上以崇明爲長  
江門戶題設重兵又以隔海遠沙難于應援遷其民安  
插內地

韓世琦字心康遼東人康熙元年巡撫江左念崇明濱  
海屢遭寇警居民遷入內地者多方安輯不令失所所  
棄界外田三千八百餘頃爲奏免其額賦又奏除崇明  
一田兩賦蘆課銀八千餘兩三年夏瀕海諸邑颶風大

作飄沒民田廬以萬計親加勘實分別題請捐折民賴以甦善政甚多以各屬未完錢糧被議去

麻勒吉滿洲人登順治九年滿洲榜進士第一人康熙十年總督兩江嘗巡視海上時值酷暑減輿從遍歷諸沙諮訪民間疾苦以知縣王恭先議題設內河駁運小艇樵漁聽民自便又竹木石灰藥材等物許令裝載出口如常海濱積困復蘇

馬祐字篤周滿洲人順治九年麻勒吉榜第三人及第康熙八年巡撫江蘇奏蠲元年至八年逋賦一百九十餘萬准揚蘇松常鎮六郡水災勘實奏請蠲賑濬劉河吳淞江以利蓄洩清田畝以豁賠累行官收官兌法以



釐漕政修築南北塘以便兵旅殲盜魁雪沉獄一時風俗寧謐會注雨漂沒田廬憂惶成疾而卒自草遺疏極陳水災民困言不及私

方國棟字千霄宛平人康熙十二年分守蘇松常道修築湖濱堤岸又修沿海墩臺橋梁及吳淞劉河兩牐措辦工費不以擾民

慕天顏字鶴鳴靜寧人康熙十五年在布政司值水旱相仍賑貸緩徵開濬劉河吳淞利七郡蓄洩尋入覲凡七上疏請減賦除荒及陞巡撫復疏請蠲被災田賦及開濬白茆孟河並建插俱爲東南之利

湯斌字孔伯號潛菴睢州人順治九年進士康熙二十

三年由內閣學士擢江蘇巡撫莅任初悉屏供帳諸物  
僚屬皆洗心供職吳俗奢靡裁之以禮立婚嫁喪葬定  
式申賽會演劇博戲拳勇掠販之禁重農事以興本業  
復社學以訓子弟講孝經以敦人倫表揚名宦以風厲  
來者悉推誠感動不徒條教虛文又累疏陳吳民疾苦  
會淮揚水災倡屬捐濟每口百日給米五斗停徵兩稅  
郡西上方山有五通神祠愚民祭賽無虛日斌取神像  
投之太湖奏聞撫吳三載食惟蔬菜供應日費百餘  
錢二十五年擢禮部尚書還朝之日吳人攀送者數  
千人旋調工部尚書以卒諡文正祀太倉名宦祠

趙士麟字玉峯河陽人康熙二十五年巡撫江蘇下車

捕豪猾姦蠹悉置之法境內肅然時太倉收白糧苛甚  
簸揚不已且折斗米至三百錢士麟行部至收蠹胥重  
杖之歡呼載道

傅臘塔滿洲人康熙二十七年以刑部尙書總督兩江  
荐拔賢能懲斥貪墨摘發如神萑苻用戢讞決明愼屢  
剖疑獄課士教民疏河墾荒請免江寧房號蓬搭地租  
歲八千兩又疏請江南鄉試增解額議准蘆課丈量五  
年一舉縣令親臨勘視三載卒于官諡清端

陳鵬年字北溟湘潭人歷知江蘇二府署布政使並著  
聲績尋擢兵部侍郎總督河道卒諡恪勤

包括錢塘人進士繆禮山漢軍人雍正朝並任太松分

巡道駐太倉整飭官方民懷其德胡文伯海陽人歲貢  
乾隆朝任蘇松糧儲道漕政肅清陞江蘇按察使旋擢  
巡撫賢聲清節並著于時

提鎮

國朝

楊承祖字大宗陝西人蘇州總兵順治二年駐崇明時  
營兵寄斃民舍頗肆驕橫承祖力行約束諭有擅取民  
財一兩者剗肉一兩以抵軍中肅然嗣有張名振犯境  
承祖統兵撲勦邑獲安枕

梁化鳳字翀天榆林人順治三年武進士自寧國總兵  
移鎮崇明順治十五年張名振踞平洋沙化鳳多方防

禦尋遣去十六年五月鄭成功犯江寧總督令以全師  
赴援化鳳慮崇明單弱留左右二營守之六月拔寨而  
進抵江寧鏖戰城下大破之命守備王龍與遊擊劉國  
玉回崇明堅守城賴以全先是邑中富室咸以通鄭受  
誣化鳳至嚴告許之令富民受誣在禁者皆釋之民樂  
更生爲立生祠後遷提督

張大治字君平三韓人順治十七年任總兵性嚴不可  
犯而樂善好施先是邑兵皆由遠調按戶派養民不聊  
生貢生施文言于總督請立營房以蘇民困令終格大  
治至卽訪民間疾苦凡苛擾者悉令歸營又以蘆課疊  
賦病民與諸大吏力爭得減十之七鎮崇明十二載百

廢具修葺捐修文廟又以歲飢蠲俸助賑存活無算康熙十年乞歸軍民送者以千計有祠在金鰲山

劉兆麒字瑞圖寶坻人康熙十四年由貢定提督調鎮崇明勤巡哨禁裁扣慎考拔戎政修舉捐俸甃外郭五關遷東獄廟於中津橋規模煥然設義塚以止火化置義館四所市田六十餘畝歲給館穀爲經久計邑有踏勘蘆洲協濟船工議增鹽引諸大費俱有請豁閩邑製萬民衣以獻建祠西關內

穆廷栻字公符宛平人康熙四十二年以武進士任崇明總兵清慎忠勤邑中稱穆聖人崇明處江海之交爲江南北會哨要地南有馬蹟洋山北有鶯遊諸山風濤

出沒當事者恒憚之杖在崇十二年以海爲家春秋操  
演未嘗回署以故海盜屏迹嘗奉 命運米赴廣東遇  
風肅衣冠默禱旋有大魚揚鬣拂濤濤爲之却生平好  
書在洋中披閱不廢間或自紉敝衣或緝魚鱗曾語將  
士曰人情逸則思淫吾不敢也氣甚和迂者不加罵詈  
然執法堅正稟不可犯子受市人金骹法充馬軍廉得  
其事集將士立杖殺之謀充者亦杖革三軍股慄後陞  
提督旋徙福建卒於官謚清恪崇明人聞其卒爲罷市  
醵金建祠

魏經國字口口正白旗人起自行伍任把總隸王府適  
府有肢體事督五日務獲經國請二日果獲王入告得

引 見體貌偉絕奏對聲如洪鐘

聖祖稱異人

者再超擢守備歷天津副將陞蘇州總兵知宵小魚肉  
善良指名捕之盡法治或涕泣求自新則舍去聞者咸  
畏服甫八月四境帖息旋調天津去兵民詣督撫請留  
不得哭聲震四衢將去兒童數百擁肩輿號泣經國亦  
泣謝曰吾何德煩爾曹如是耶他語爾曹未懂惟孝順  
父母而已兒童泣應及外津橋宵小亦奔送皆失聲焚  
香盈道其得民如此嘗言我幼未學但憶魯論其身正  
四語足了我一生矣陞湖廣提督調江南卒

馬全字具堂太原人長身偉貌勇悍絕倫始以武進士  
第三人任遊擊註誤復以武進士第一人任南昌總兵



調蘇松鎮軍令嚴肅操防如制頒騎射式合格者旌之以教未逮者士卒無惰容無驕氣行伍爲之一變陞江南提督大金川畔任參贊大臣陷賊營不屈死恤贈祭葬雲騎尉世職諡忠烈

太倉州

知州明及國朝蘇州府知府附

明

況鍾字伯律深州人始以吏事尙書呂震薦授部曹宣德初擢知蘇州府賜敕以便宜行事下車吏抱案牘請署鍾默默若無能爲旣三日摘發其故爲出入隱竄顛倒者立杖殺之僚屬震栗扶弱抑強置善惡二簿民畏

而感之無不從令郡田稅額最重鍾奏減正賦七十二萬一千有奇募民墾荒起科以免賠糧一十四萬九千五百有奇停徵淹沒田糧二十九萬五千免舊欠糧草鈔數百萬罷平江伯歲取民船五百艘免買船米一十五萬一千八百石疏免採買闊白梭布七百疋絲數千兩奏革倭船徵需請濬水道辨明平民誣入軍者千八百家招復逃亡三萬六千七百戶又以其間振興學校薦拔孤寒九載秩滿將去郡民叩關乞留至八萬餘人遂遣再任正統七年卒于官往時太倉賦最重其得遞減者皆鍾力也州人感之祀名宦祠

林世遠口口人宏治年知蘇州府值崇明施天泰等作

亂謀入劉家港縱火而西都御史魏紳檄世遠諭降之  
祀名宦祠

國朝

賈樸口口人康熙四十三年知蘇州府潔已愛民整飭  
綱紀按部至太倉親鞠劇賊馬張二等得實飭署州商  
奕銓立斃之州境以安

已上知府

元

王安貞字吉卿相臺人延祐初以朝列大夫知崑山州  
兼勸農事時州治初遷安貞事有規制民不知擾政教  
並行秩滿遷饒州路治中州人祠于學

那懷蒙古斡吉剌氏延祐初以武德將軍任崑山州達

魯花赤時州未立廨懷廉敏始作之先是上官至民苦  
供帳懷以公緩預辦役始息又崇儒重老成爲時賢牧  
八資刺字思齊畏吾氏至元二年以奉議大夫監崑山  
州先有儉人占學官斥諸生立石隱界八資刺下車卽  
還諸生籍興復如舊又建採芹亭風俗爲之一變

勃羅帖木兒字存中唐兀氏至正七年以奉議大夫監  
州適立都水庸田使司受委開浚工畢民不知役修廟  
學禮樂力善有仁恕風

史文彬丹陽人至正九年領州事明年春海寇犯境官  
軍百艘所過橫掠文彬嚴禁之犯則立置于法民以安  
堵新廟學增弟子員勸農平役皆極明幹

明

李端字表正棗陽人宏治十年立州以御史出知州事  
時方草創兩衛弁爭長軍伍仍故習侮鄉民端治以法  
皆斂手服崇明有黃道忒刼殺人縣莫能禁端以計擒  
之笞死爲人倜儻負氣節面折豪貴無所諱尋陞廣南  
府知府行橐蕭然州人思之祀名宦祠

翟敬猗氏人由翰林院檢討出令休寧來知州事蒞以  
寬簡嘗靖海盜不見聲色三遷鳳翔府同知累官都御  
史

倪宗正字本端餘姚人以翰林院庶吉士出知州事有  
性度和易近民時東南大水民死載道宗正殫心拯揀

疏陳利弊六事其興水利均田稅尤爲切要遷兵部武選員外戒行州民遮道泣焉

黃廷宣字汝爲莆田人正統二年進士知州事撫衆慈易于奸宄不少借禁游僧毋入境數毀淫祠立鄉學延師訓子弟歲旱去冠蓋被農民服祈禱四郊三日而雨時冠禮廢廷宣醮其子擇名士爲賓曰此古成人禮以爲州倡性方嚴不能曲意在州五年改南京右軍都督府經歷祀名宦祠

劉世龍字允卿慈谿人正德十六年進士知州事世龍短視動止簡略然性明察心在民事公暇喜吟咏善書草居三年入爲國子監博士

陳璜字珮之鄱陽人以兵部郎中調外知州事吏治尙修謹不爲深文修廟學創三閘撤淫祠材建尊經閣公私不擾暇日集諸生講說經義人稱循良

王揚字維直三河人以刑部員外郎出知州事性剛方又通敏無留獄教子弟有法州苦徃役里胥得爲奸揚手自編次民力乃均未二年入爲兵部員外郎

楊儒魯字得之興國人嘉靖五年進士初知通州改太倉儒魯坦易好文墨有乞書者公暇卽據案應之政近人無操切轉戶部員外郎時郡縣吏任內有民逋雖遷例不得去儒魯旣轉得代巡撫責完逋因僦居民舍民爭輸之不一月報具足

黃仁山字元靜新淦人以給事中遷嚴州知府謫知州  
事注明敏御事精審凡獄訟錢穀皆無留滯陞馬湖府  
同知

熊桴字元乘武昌人嘉靖二十九年進士知州事四十  
二年倭突入劉家港掠州四境尋薄城桴晝夜乘城守  
適御史蔡某至倭乃去復奉臺檄出入兵閒多軍功當  
倭掠時掘地夷竈村鎮幾無人倭退桴百方撫循復苦  
旱請于都御史周如斗疏免一歲稅糧子遺始全活以  
功陞蘇松兵備道時崇明悍軍不逞嘯聚而亂桴誅首  
惡十人餘悉不問軍中悅服先是三十八年倭據三沙  
桴相持三月連破之賊遁去四載中築城修備練師置



艦保障功爲最又建言防海三策爲東南永久利

孫科號勿齋普安人由舉人知州事性介不名一文時

苦里甲供應條上得召募設諭盜六禁民知懲勸月課

諸生勤學者優給之教俗儉約務修行兵荒後賴以安

息在任三年祀名宦祠

案元亨閒話云勿齋母賢外庭交際必命謝去終布素間堂上

撻聲必問何事勿齋嘗語子曾受知溫三山先生因知有賢母成德知已成名人品固非易致

袁伯睿江西人由乙榜知州事政簡約不徇請謁或屬

以事卽面謝不敏時田賦多隱匿伯睿履畝清量豪不

得占隱額遂平性極遲緩太倉方言目遲緩爲木拖因

以呼之伯睿聞笑曰後人當思我木拖也去果懷之

韓策字廷對南宮人萬歷十三年進士知州時值十六

七年水旱胥骸盈路策請臺司得公鏹萬餘浚水道民  
因藉畚鍤全活且貽遠利其審徃役與鄉民絮語積日  
務得其情

丁永祚號建白南昌人萬歷十七年副榜授福清知縣  
陞太倉知州歲旱潦永祚蔬布徒跣烈日泥塗中雨暘  
立應羽書急催科令民無恐我以官爭之民不忍逋賦  
亦辦給定役下里孤嫠至攀案與爭用物給平值牙戶  
不知官估先後七年憂去

趙贊化字延禧德化人萬歷四十一年進士天材敏決  
事無留者州故二十九都都設畝不等畝設甲十甲領  
散戶胥匿賦每徵籍止載欠數凡田若干稅糧若干不

攝總數可以恣弊贊化立長單法先開甲幾戶總田若干應稅糧若干次畝次都完欠數並列每甲給一單臨比視單會計胥吏洗手而退舊時十甲輪充里長任催一都賦當其年者殊苦贊化獨責都中逋重戶任催如自及額卽易他逋戶時號欠多帶比復寬程限故賦清民不告難治獄立辨兩造咸服或偶失當有所聞卽引咎改之家人歸一老僕左右夜篝燈案牘畢身執爨供嬉笑爲樂任五年陞工部員外郎

陳如松字白南同安人以乙榜由蕭山知縣陞知州性落拓絕一切尺幅然負高才有強力事無劇易五官并給治大訟呼兩造搖手何苦結寃我爲若解之小訟輒

開兩手作勢曰多事遂去州例官放衙筦庫吏治具以進如松叱去候臺司出或餒出袖中錢市糲食卽臺司至供帳簡脫詰責亦不動也嘗試童子卷千餘一日夜榜發有愬遺斥者如松問姓名卽誦其疵句驚相匿去書法名家人乞書就判案應之太倉事繁如松以游戲治之而有餘二年不合上司意拂衣去祀名宦祠

劉士斗字瞻父號映薇南海人以崇禎四年進士知州事讀書知大體常時不取一官下物值生子市吳綢四尺人以爲異心至厚坐堂上村婦子皆得至其前嫉惡最嚴以次鉏害馬四五輩下車時衙役衣鮮衣乘肩輿其役身宦家者益橫士斗皆繩以法以豪凌良弱訊之

無少假借他邑杜滯多乞臺司赴太倉訊辨仿前知州趙長單法故賦清朔望集子弟甲乙之子弟勸焉六年冬署崑山適漕卒恣暴民譁忌者以聞左調去兩邑士民號呼負磚石填城門適巡鹽御史行部羣訴且泣御史特疏辨留不得扁舟夜出境後任成都推官十七年擢建昌兵備僉事未行佐巡撫劉之勃守成都張獻忠陷城被殺妾張氏幼子晉積薪閭署自焚二十餘人同殉義祀太倉名宦祠 國朝賜諡烈愍

錢肅樂字希聲鄞縣人崇禎十年進士授太倉知州豪奴黠吏按必如律又以朱白榜列善惡人名械白榜者階下予大杖久之杖者日少在任五年善政畢舉與州

人張采同修州志又嘗攝崑山崇明事兩縣民皆立碑  
頌德遷刑部員外郎尋丁外內艱順治二年後挈家遷  
海外卒事詳明史 國朝賜諡忠節今祀名宦祠

國朝

李作楹字辛水孝感人明崇禎三年舉人知州事 鼎  
革初海氛屢警苦供億作楹儲侍糧草取辦俄頃  
大兵過民不爲擾時新令未頒賦役紛雜訟獄滋興作  
楹剪姦抉弊綜理無滯衆心折服又以其餘衡文校士  
獎勵諸生遷江西建昌同知祀遺惠祠

白登明字林九奉天人由柘城知縣陞授知州甫下車  
立四禁一衙毒一地棍一賭博一姦淫浹旬試諸生令

于卷尾陳利弊以次摘發無遺時大蠹五六人盤踞州境構陷良善人不自保復邀結撫按衙門操官吏短長莫敢詰登明先後計擒之杖斃通衢又姦人專以假盜假命或羣撫陰事思興大獄鞠訊得實必立斃之剖斷若神伺察辭色片言摘發無不奇中鄰境有冤咸請上官付州質審尤以德教民立講院舉同善會賑孤貧旌孝義無虛日催科自正供外毫無羨餘州民之以條丁銀自封投櫃自登明始岡身高仰水利壅塞登明用銷圩法先浚朱涇旣浚劉河六十里不兩月工竣實爲東南七郡水利會以逋賦劾去士民祖道闕咽鄉城皆立祠今祀名宦祠

朱士華字君實鑲藍旗人廕生康熙十六年任知州莅任後勸農桑省刑罰緩征稅絕苞苴禮賢敬老爲政不尙煩苛務以德化以拙于催科罷去去之日居民泣送者萬人先是嘉定令陸隴其亦以絀誤去時父老稱朱陸云

王溯維字七峯嵩縣人康熙三十九年進士由崑山令陞知州州鄰崑山溯維爲政強敏人著至州姦猾屏息夜不吠犬衢巷不聞鬩闕者時立鎮洋分治州歲漕猶六萬有奇溯維不秩一人旬餘報具以遷去

黃廷銓滿洲正紅旗人由高郵知州調太倉性遂直廉斷折獄憑法不受請謁罷官後僑居民舍餽粥不給竟



卒于寓

江之煒號葵峯晉江人康熙三十五年舉人雍正十一年由嘉定令陞任州故無當舖時被祲後貧民緩急即便之煒謀請蘇郡巨當分開州境至今民賴之州之田賦舊設圖書冊書里書區書催科則有里差地差坐差諸名目民苦其擾之煒勒碑永革并檄四邑通行之每朔望必課諸生于尊經閣下手定甲乙如汪廷璵錢文梓皆其所識拔一時有人倫之鑒乾隆五年以事劾去傳椿字受先鑲黃旗人由高郵知州調太倉爲政明敏案無留牘披覽訟牒洞見委曲經其摘發人人以爲公在任二年疏七浦通城濠經理有次第遷淮安知府民

惜其去

趙錫禮字叔叙蘭溪人雍正九年進士由泰州來知州事幹練勤敏用法嚴明民不敢犯民間買田宅輸稅者向假手胥吏累歲不給印券弊日滋錫禮每升堂新收契稅鈐印對給民甚便之州治久圯以罰鍰葺而新之在任一年擢知安慶府

蔡長濤字巨源漳浦人以官生考授京畿知縣乾隆九年由無錫令陞任太倉州父禮部侍郎世遠理學名臣爲時推重長濤守其家傳施之政事勤恤民隱廉正自持時州境有民婦黃徐氏以邪教煽衆其黨蔓延事覺捕之誅其首餘置不問性忼直不少依附陞松江府

與同僚謁總督植立不拜制府加之聲色長濡不爲屈  
後仕至刑部侍郎

宋楚望字荆川當陽人雍正十一年進士乾隆十七年  
由揚州府同知調太倉初下車咨訪民瘼沿海屢被潮  
患請借帑築塘捍禦巡撫莊有恭入告得 旨自寶

山北至常熟支塘界綿亘五十里五閱月告竣復著海  
塘紀要一書于善後事宜尤極周悉聽斷明決有神君  
頌如捕役叅賊之弊每竊盜案發立限過期不獲卽禁  
其妻孥以故盜風寢息時鎮洋令冷時松創婁東書院  
永竣楚望籌經費增膏火又于歲除囑 司赴四鄉給鰥  
寡老疾之無告者在任二年擢常州府送者繪雙旌圖

以贈焉

邵豐鏃號萊峯山陰人監生以保舉由山西惇縣令陞任知州豐鏃老于幕通習吏事嚴正自持勤慎不苟吏民安焉在任八年凡育嬰普濟諸善政經理不怠城門堞樓爲兵弁守望所頽廢已久悉增建之以年老大計去

貴卜孚號嵩崖武陵人乾隆九年舉人歷任知縣陞知州中孚精明強幹亦長于掄文州志自明張采後無繼起修之者中孚慮事久湮沒嘗設局尊經閣下請王宓程穆衡排纂草創未就滿任去事遂寢

朱覲光字龍溪營山人乾隆十八年拔貢生由咸安官

學教習授六合縣陞同知乾隆四十九年知州事值崇  
明潮災覲光卽日渡海撫恤賑濟民賴以安練習政事  
人不能欺治匪類尤嚴四境帖息歷署蘇松二府旋擢  
知徐州府調江寧府以句容有重徵事罷官

秦廷堃號復山漢軍鑲黃旗舉人由蘇州海防同知遷  
知州性豪直賞罰嚴明時州民某有佃爲仇所斃佃屬  
誣之邑令不察漫加刑鞠讞已定值廷堃引見回廉  
得實竟雪其冤而正凶亦不漏網士民頌之陞紹興府  
孫思庭字□□懷來人乾隆二十七年舉人由上海知  
縣陞任知州思庭爲政精敏賞罰必行未下車一切賭  
博無賴及流妓剽賊無不聞風屏息旣至凡積年案牘

經理一清里閭肅然在任三月卽陞昭東府知府去

以上知州

太倉州

倅貳

元

姜復昌嘉興人泰定初爲崑山州判官時津助法行與省官覈產程役務于平愜寬免單窶值長官粗獷復昌氣容溫舒遇事執直長官率爲之屈

徐石麟字仁孚蘭溪人至正間任崑山州判折疑獄修水利往役咸當旣休遂家于州貧不自給卒葬城南隅盧熊志其墓稱其出處議論淡然古君子

邵肅字彥清山東人任崑山州判專職農事至正間田

多汙下肅修築堤岸與民勞苦工成潦不爲災

明

丁隆字時雍南昌人由御史謫州同知州治經始多資規略與知州李端並著賢聲四年陞延平府同知

璩淵新城人由吏員累官至州同知性廉靜布袍蔬食不攜家累一僕給薪水期年致事去知州倪宗正以三十金贖淵卻之弗及歸寓書歸金宗正嘆曰當爲建却金亭以記其事

黃暉福寧州人父釧仕溫州府同知歿倭寇之募暉以蔭補州判能于其職監司檄署嘉定縣其人貌雍而視正其政廉而不劇寬而有制勞而善讓甫四月輿人頌

之後調楚藩護軍經歷

按徐學謨海隅集有贈太倉州黃倅赴楚藩經歷敘張采志無

傳惟官師表內其時州判官有黃諧黃睥二人譜註黃梅人而睥下獨無注以學謨敘証之其爲睥無疑福建

通志亦止

有黃釗傳

王伯安確山人由吏員累官至州判有材聲務廉慎時海上盜起伯安破之正德中以憂去

孫瓊肅寧人由監生任州判恭謹有幹力尤敬禮賢士擢知山西榆社縣

章綸字理之山西人由監察御史出判州事時知州梁穀憂去綸署兩月人頌其清約尋改知濰縣

周延字南喬□□人以兵科給事中言事左遷州判官性嚴毅律已清約繩豪右必以法人不敢犯時崇明海



冊議遷縣治延承檄往凡公署興建及溝塗曲折悉經  
營度民咸安之憂去餽遺一不受

董效賢號北溪釣州人爲太倉吏日嘗跡島盜從壯士  
拚之盜魁就縛立解散其黨奉檄築崑山城其所分功  
獨巨而獨早就身旦暮販築間役夫不待敲扑而集上  
官器之復使覈崑山逋賦效賢窮搜其弊一切伏匿者  
悉出半載丁母喪去先是效賢至太倉病有異人脉之  
曰是非可以藥餌加也問其年四十八則以紙如其數  
覆背穴上而以簪濡油然火紙熱如炙而不傍熱如此  
者數處拊背曰起起期後三日當復來後三日不來而  
病已愈矣

王聘字彥覺利津人由兵科給事中言事謫州判性諒  
直居官惟一僕應門營公事夜歸身自厨炊取餽粥盂  
蔬以食每行鄉屏軒蓋遇農耕則止隴上勞勸如家人  
兩署州事不事煩苛有興舉必通下情遷南京戶部主  
事

李乘雲字子雨鈞州人以監察御史言事左遷州判官  
乘雲質直處官如家不肯以諂官避事能體民隱嘗編  
次里甲視田豐嗇務稱平軍衛亂悉釐正之居未二年  
陞蒲州知州

湯拱顙州人以歲貢生選同知處事詳慎居四年清白  
不渝陞成都府通判去

王儒蓬溪人以歲貢生除州判官廉介不苟時俸廩例  
富加直儒獨從市價餘却之嘗承檄城崑山縣餽遺供  
億一不受自初任至轉官服敝則澣補未嘗有改居三  
年陞雲南永昌府推官

李枝秀字干雲肥鄉人進士左遷水利判官署知州清  
平無擾時議浚鹽鐵塘故時開河豪強漏役又每都設  
塘長凡管河官必索陋規且日責供應既具復乾折費  
鉅甚工卒不集枝秀計畝受工用水平法定深淺下令  
塘長我無他科第集工情有重典刻期行河塘長亟率  
丁夫趨事于是鹽鐵塘通濟三十餘年

國朝

楊琳字懷眉成都人崇禎時以恩廕補臨洮府庠生嘗從李定國爲前鋒以軍功歷任戶工二部主事入國朝授太倉州管糧通判以敏練稱性伉直與州紳胡某積不相能巡按某劾之吳三桂叛從軍有功授臨安令多惠政罷官後遂家于太倉

商奕銓字右衡紹興人由監生考授州同知三攝州印有能聲時沙溪劇賊馬張二糾夥肆劫吏不敢問奕銓計擒斃之康熙四十六年姦僧一念等尅期倡亂鄉民煽動市猾錢保陸申等約內應知州李颺廷聞變惶懼失措奕銓令城中警備親率民壯夜擒保次擒申一念逃匿獲其簿籍劄付次日按簿擒四十八人餘悉不問

焚其籍督撫以聞保等皆伏誅又明年一念亦伏誅在任十三年以攝印時腐米落職羈太倉貧不自給乾隆元年遇赦不能歸卒塋太倉

儲京靖州人以附貢生任州吏目操守廉潔嘗刊印培植心田語示民咸其教者多化頑爲良性慈善好誦梵經人以老佛名之陞鎮江府經歷去已上倅貳

學正

元

孔淵字世陞孔子五十三世孫其六世祖端越爲宋顯武大夫南渡至淵父之敬任元通州監稅淵由通之崇明徙家崑山元祐元年州治遷太倉新作學宮皆淵成

之遂攝學事學行修治爲人倫宗號莘野老人子克讓  
孫士學能世其家

明

朱冕字士章嘉興人由崑山縣學教諭陞太倉鎮海衛  
學教授課諸生有常程當課者居宿學舍冕閒持炬隨  
一童歷省勤惰發疑難衣冠步履皆由師法後有孫珩  
餘姚人方嚴爲冕繼

李亨字嘉會華亭人天順閒衛學教授時新建學亭增  
葺學舍民閒子弟近衛治者咸得肄業

甘澤字仁夫蘄州人州初立爲學正立教規公暇閉門  
讀書分外事一不問亦未嘗苟談笑

錢世資雲南人正德九年爲州學正議論精暢自處極儉約念親舍萬里請布政司咨雲南分常祿以爲養已擢四川仁壽知縣

蔡廷周南昌人先授泗州學正左遷州學訓導清心苦學夙負剛直間有諂進輒面斥有敎誨反復不倦正德十四年聘陝西鄉試考官中道疾還卒于官

黃績莆田人州訓導端方純正誨諸生言論敦切足爲後學師表後被誣去生徒上下泣辨竟莫能白

朱邦彥字民章永嘉人嘉靖十三年以貢授學正月試必治具以供進所拔士諄切勸獎其有喪及下貧則不時周給之學道聞人詮以四十金檄備書籍邦彥出私

錢至浙買書百餘種爲笥櫝貯于學還所檄金改建敬一亭及土地祠又置月試坐几六十餘擢延平府教授生徒百里泣送

常文烱號仰坡秀水人以會試乙榜第一領州學事重經術名節弟子謁不問贊問業擇善者給膏油費貧者且爲代謀喪殮至醫已田以應有負枉或困繁役及他調發非分者白其狀得毋往知州尊其言無弗聽訟庭蓋無弟子跡也居五年聘貴州鄉試考官遷國子監丞錢景醇號琴箱無錫舉人署州學正氣度翔雅進子弟講文行却所執贄故事新進子弟必第其家高下徵脩脯景醇恥之謝絕月立期課偶註訟事則爲援解貧諸



正統九年少志 卷第一  
生有侯以舉火者轉國子監博士

蕭思似寧國人以舉人署學正攻性理教子弟從王守  
仁學與鄉前輩徐鳴臯辨難持身嚴整嘗清學租積弊  
修治學宮一時矜式

馬希尹字維任無錫人以貢生任訓導適學正缺署印  
凡二年希尹勤較課勸廉讓故時知州朔望行學青衿  
環列言事希尹約束之喜談忠孝重鄉飲酒禮與人恂  
恂至義理所在則奮往不可動學田有餘租以歸公陞  
廣西平樂府教授不仕歸祀名宦祠

文祖堯字心傳呈貢人以明經授名山訓導崇禎六年  
陞太倉學正時師道壞學宮圯師弟子視若路人祖堯

至葺文廟修尊經閣整祭器頒諸生儒學日程書善過  
月朔集明倫堂考其進退諄諄以聖賢之道相勸勉  
鼎革後棄官寓僧寺閒以青鳥術自給州人皆知滇南  
先生爲古君子久之南歸道卒門人私謚貞道先生卽  
故寓爲祠曰思賢廬後建祠學宮左今祀名宦祠

國朝

李煜字亮采本曹姓金壇人邳州籍順治十四年舉人  
授州學正爲人豪宕歷落作詩文敏捷爽健葺學舍嚴  
祀典月集英雋課之又建射圃亭仿先正觀德會與諸  
生習射其中衆論翕然邑中有大議或大工當事多委  
任焉以卓異遷莘縣知縣

吳雲堦字木夫上元人雍正二年舉人考授中書乾隆二年會試明通榜收授學正由六安調太倉操守廉靜務以行誼誨士文章樸實一宗先正理法每課文甲乙精當監督書院諸生膏火無纖毫私鄰學孫斯位鄭拱圖卒于任傾囊經紀其喪乾隆二十年禾災委查賑實心稽覈

陸國賓字省齋華亭舉人乾隆二十六年任州學正才識明達操行端方陞巴東知縣去

呂鴻字雲遠金壇人雍正十年舉人乾隆三十二年授太倉學正爲文章雅有先正體裁古貌古心勤于訓迪從遊者咸敬而親之卒于任

薛樹字南沙常熟人乾隆十年舉人乾隆三十八年任  
州學正熟嫻文律諸生質正者口講指畫娓娓不倦任  
滿以老辭歸

直隸太倉州志卷第十終

直隸太倉州志卷十一

名宦

中

鎮洋縣知縣

國朝

陶士傑字倫宰寧鄉人雍正元年進士以庶吉士授知縣時鎮洋新立士傑至規模多所剏定爲治靜正一時安之在任四年以累謫去後開復陞廣西太平知府唐尊堯字際虞龍里人康熙四十年舉人雍正七年知縣事性強敏善折獄部民一見卽識其人吏不能欺十年海溢漂沒田廬溺死三萬餘人尊堯躬至海上殮埋之災民洶洶不及上請急出俸市粟食之有桀驁者籍

衆恣肆陰識其魁捕扶之衆乃定嘉定民入境聚掠親自逐捕遂散去任五年被劾去士民思之

金鴻字上侯天津籍山陰人雍正八年進士乾隆四年知縣事政務寬仁聽訟不事鉤挾惟以溫語相感動而得其情催科有法輸者自至劉河久患淤塞鴻議開濬舊例太倉鎮洋與鄰邑計畧分工至是寶山圖諉卸以不占水利爲辭鴻力爭之上官得如例畚鍤四集躬自督率役不淹時民賴其利州志久不修鴻延禮邑士大夫討論成書百年文獻有徵爲功甚鉅九年以前任署東平州事註誤去引見補甘泉令民思之不置

冷時松字茂公廣西臨桂人雍正八年進士乾隆十年

任鎮洋知縣性廉介明察杜絕苞苴請託吏胥不得夤緣爲奸二十二年秋潮災時松親歷沿海鄉鎮便宜發粟設賑災黎始得存活縣境劉河及州縣分管之楊林潮汐易淤時松以時深濬民不勞而事集又創建婁東書院邑人聞風捐助田畝以資膏火規爲粗就旋調常熟令去

福安字

鑲黃旗人乾隆三年舉人由署元和縣補

鎮洋愛民重士前令冷時松建設婁東書院規條粗立未竟而去安莅任次第經理一切詳備縣試所拔皆寒畯在任一年陞邠州去仕至河南道

荆如棠字陰南山西平陸人乾隆十三年進士以檢討

正義大卷州志 卷十一  
出知鎮洋事愛民勤政廉潔自守不名一錢如棠雖文士膂力絕人每夜常持稍據鞍遍巡城邑居民不戒于火家有棺數十人舁之不能動如棠出諸烈焰甫一歲調沛縣去

賴晉字錫蕃江西廣川人乾隆十三年進士二十二年由安東調鎮洋邑境故有窪地蘆課後因開浚劉河并建軍工船廠挖佔蘆田蕩塗地少于前乾隆初兩次清丈案內又報坍田若干巡撫陳大受題請豁免戶部以無年月可核照舊徵收晉莅任後憫民無業賠糧力請大吏題咨者四中經部駁者三卒邀

恩旨永遠豁免至今民德之二十四三十兩年爲南闡



同考官所拔皆知名士陞永寧州去

馮聖世字疇九漢軍鑲黃旗人乾隆六年舉人四十三年補鎮洋令性慈善聽訟務寬平愛民重士邑濱海秋多潮患聖世隨時修葺塘工以固閱兵臺前石塘最險要聖世築一坤卦形鎮之自後無衝突之慮四十六年夏颶風陡作近海皆被淹歿死者無算聖世親爲履勘出資掩埋并查被災田畝據實詳請題准緩徵民皆戴之年七十餘卒于任

〔佐貳〕

蕭登生號步瀛華陽人選貢生乾隆二十一年任鎮洋縣丞恪守官箴攝縣篆一以刻苦自勵閒食粥從者苦

之有引去者尋調去後官至知府

李鳳彩雲南建水人乾隆十九年舉人會試取名通榜三十一年大挑以知縣用借補鎮洋縣丞歷署州同知及縣篆清廉自愛往往餽粥不給鳳彩文學該洽長于詩王成爲雲南學政時所識拔至是每以詩相倡和俸滿內陞通政司經歷

〔訓導〕

李鈞字正衡吳縣人廩貢生乾隆十六年任鎮洋訓導才識敏練屢奉檄委辦公事學政李因培亦信任之後以卓異陞貴陽府經歷

余大中號南塘宿松人乾隆三十九年以歲貢生任訓

導樸誠待物訓迪士子恒以文行相勗以老去諸生刻  
去思文頌之

嘉定縣知縣

宋

高衍孫字元長四明人嘉定十年分崑山東五鄉建縣  
時衍孫令崑山將受代臺府重經始之難特奏俾任新  
縣衍孫以五鄉之民逋違稅租詭挾戶籍積歲旣久若  
行操切之政民且流亡具白臺府凡八年九年畸零二  
稅先後倚閣十年者孫助本縣營造稍寬其力新賦之  
納則自十一年爲始秋苗減令耗夏稅免增絲罷財糾  
司以絕橫免草創初凡廨舍學宮倉廩壇宇驛舍門關

城隍坊巷靡不周備民德之致仕後不忍其去固留之  
子孫遂家焉

常懋字長孺武康人淳祐七年進士景定初任嘉定居  
官廉謹不畏彊禦屬歲大祲設法勸糴民受其惠後官  
至浙東安撫使事具宋史

〔元〕

任立字固卿太原人以朝散大夫任知州廉正不阿釋  
冤獄四十九人歲祲設法賑濟全活六千餘戶

王立中字彥強西蜀人徙家長洲至正閒由慈溪尉遷  
知州事以廉靜稱後遷松江知府博學善屬文工畫有  
息齋寓齋等集

明

張率字孟循臨川人吳元年來知州事上海豪民錢鶴  
臯爲張士誠餘黨遣其徒襲嘉定率被執不屈繫松江  
獄鶴臯平率詣軍門曰弄兵自松江耳嘉定未嘗叛也  
請以餘生丐數十萬人命乃還縛松江叛人數輩而爲  
檄告州人毋恐時俞平章屯兵太倉聞嘉定失守遣兵  
來援率固請還兵合境安堵明年提刑使者誣以罪率  
置對慷慨不屈罷去民哭送之率雅負詩名有張嘉定  
集初率在松江獄賊脅以刃有集仙官道士楊仁實字  
一溪素負氣誼奔救之得免

樊鎮考城人洪武二十四年進士建文中由御史調任

歷四年廉幹精勤始終一節永樂初徵至京縣民詣闕  
請留不許任終山西布政使

練達字必亨新淦人建文閒由浦城教諭來知縣事靖  
難兵入其從父副都御史子寧被族誅達知不免與妻  
訣曰吾其死矣妻泣曰君死吾卽從之妾黃氏方妊額  
曰當奈此何初邵民郭元宗被誣爲盜達廉其冤出之  
至是詣達請閒欲與俱亡達謝曰死耳行將安之已乃  
謂曰吾義不容免但練氏宗祏可念吾妾行就館願屬  
君生女爲嫁其子母幸生男君可子之以延練氏元宗  
泣受命達及妻竟赴海死元宗迎黃氏至處之別室給  
衣食比生男元宗不敢溷以己姓念其父昔爲邑侯而

嘉定號練川因託姓名曰侯居練震暘其後裔也達于

國朝乾隆四十一年 賜諡節愍

朱顯宗諸暨人持身廉潔釐弊興利民甚德之卒于官  
祖述字尙賢昌黎人以福建叅政左遷知嘉定縣悉心  
民隱每朔望必集父老詢邑中利害海田坍卸賦無所  
出又歲辦糧艘民力不支多竄徙奏上皆罷之境內水  
道久淤禾比不登次第疏濬水旱賴以無慮

龍晉字遵叙吉水人景泰五年進士由監察御史出知  
嘉定邑有獄累年不決甫下車片言折之馬役病民請  
于上官得寬省時吳松江淤塞晉請巡撫崔恭濬治之  
復濬鹽鐵諸河以瀦清水築壩沿海諸口以遏渾潮方

開浚時得一石水中其文曰得一龍江水通後工告成  
卒賴其力重修學宮殿廡齋舍靡不改觀嚴考課禮賢  
儔士風丕振擢徽州知府改常州

洪冕字廷章成都人景泰五年進士涖官六載恩威並  
濟善察民隱人莫敢欺嘗有火災冕叩首籲天火尋滅  
以憂去後擢御史出守杭州

白思明字睿之平定州人成化二年進士邑有桀黠者  
陰操人短長爲奸利思明廉得之亟寘之法劇賊出沒  
海中剽掠爲害者衆又計擒之遠近帖然先是瀕  
海遭大風海水湧人畜多溺死請于上官築土爲隄凡  
百五十里民恃以無恐擢吏部主事歷官至都御史



吳哲字克明臨川人成化八年進士誠心質行愛民如子以六事作箴置座右時久旱哲爲文禱雨雨隨至海濱有小蜉蝣稼哲以水族爲災海神失職爲文責之一夕徙去民適市貿易遠者必竟日返哲度其地之中爲市民德之號吳公市後擢御史終知府

陳遵毅字貴宏廬陵人成化五年進士爲監察御史宦官汪直用事連章劾之謫令遂平調嘉定歷三年政績甚著陞廣西慶遠知府

王術字用仁慈谿人成化五年進士爲治先教化勤于簿書經畫具有程法縣故有荒田千頃賦無所出責賠里胥術設法招徠及勸相有力之家計畝開墾不足者

給牛種助之流亡漸復歲賦以充其催科首製清由法尤爲便民其法每一甲十戶以糧數多寡爲前後首限完四次限末限各完三分惟大戶頑者聽比小戶中戶則否又築海岸萬丈徧濬河渠有捕卒誣怨家爲盜逮繫甚衆術疑之故緩其獄竟得真盜所誣盡釋擢監察御史

靳願字養正滑縣人宏治十二年進士廉毅英敏不畏強禦終其任無敢以私干者將入覲守庫吏白獻羨金曰此屬公帑我豈以營私叱去之後卒于官

王應鵬字天宇鄆縣人正德二年進士爲人端方清慎簿書細瑣無不親覈嘗按府倅黃某罪斥縣丞張某貪

境內肅然選集俊髦居學舍躬自督課嗣是擢科第者甚衆被召赴京僚佐餽贐一介不取行至淮有持金二鎰布百疋獻者應鵬驚問故曰感恩耳乃受布一疋仍製衣以賞篙工其清介如此歷官至左副都御史巡撫保定

陳克宅字卽卿餘姚人正德九年進士寬平得衆時解糧戶多至破產克宅用數人共一役民便之邑故有版荒虛額無徵奸民頗以熟田竄入克宅親行履勘宿弊悉清累官副都御史巡撫貴州

李資坤字伯生昆陽州人正德八年舉人以宣城課最調任嘉定性強毅清節絕倫時奉行均田法大吏以資直隸太倉州志

坤清嚴素著檄先試之法既定而後鄰州縣皆取則焉  
其政事尤以作人爲先忠孝貞烈二祠思賢堂皆其所  
建立社學十有六皆有廬有田爲永久計擢南京刑部  
主事終銅仁知府

王重賢字子尙交河人正德十六年進士由御史出知  
嘉定爲人沉靜不輕更置而條理井然丁憂服闋官戶  
部主事尙書薦其才被命清理江南宿逋上疏力言吳  
民凋敝方當蠲貸豈宜更竭民力忤旨左調終江西按  
察司僉事

馬麟字子振巴縣人嘉靖十七年進士嚴重寡言笑人  
不敢以私干邑有桀黠爲伍衆患之一日密召其魁令

自相摘訐先後盡置之法嘗濬練祁塘自城至外崗鎮止舍于外七日而畢無不中程者值歲祲發穀賑飢至二十萬石全活不可勝計陞戶部主事累官至太僕寺少卿

張重字汝任順義人嘉靖二十年進士識高才達邑有興革毅然行之而情法兩盡尤究心水利陞兵部主事終郎中

張守直字時舉遵化人嘉靖二十三年進士初至屬歲祲亟請發帑賑民簿書獄訟俱手自判決胥吏不得爲奸重節義崇學校禁遊惰興水利分沙田清鹽課聲譽籍甚邑故有糧長收頭充役者家輒破守直首罷之一

切庫子里長匠直市直供億裁省殆盡及被召僚佐餽  
驢峻卻不受父老爲立景節去思亭陞吏部主事歷官  
至刑部尙書

萬思謙字益甫南昌人嘉靖二十六年進士政尙惇大  
不矜名炫才邑多逋賦逃匿者衆田益荒思謙招集流  
亡事皆中窾三十二年夏倭寇薄東城乘風焚倉舍城  
幾陷思謙叩頭籲天風反火滅連以矢石斃二酋賊乃  
去邑城土堞難守請易以磚石會遷刑部即留候工畢  
五閱月城成明年賊果大至恃以無患遇事皆熟思若  
不能決不知者以爲鈍思謙笑曰昔賢有云後人當思  
此憤憤殆謂我矣初城北有中心橫澗思謙排衆議作

壩及倭艘經婁塘不得入人乃服其先見官終太常卿  
樓如山字公安東陽人嘉靖十四年進士涖任後吳中  
大水乘秋冬米價未貴出公帑萬金糴米得二萬石儲  
之令民稻田兌本色花田輸折色尤荒者出吳淞糧時  
吳淞糧以四季對支可從容辦也是歲改折漕糧十之  
五然尙須五萬石民閒苦無從出乃以所糴米兌軍而  
令民每石出銀七錢復以其餘食饑民人稱其幹濟會  
有姦民投勢家者欲窮治其事嗾監司置下考罷去人  
皆惜之

蔣機字若衡豐城人嘉靖四十一年進士長于吏事案  
牘填積判決如流游饑後部院督趣逋賦追攝者踵至

機謂天災流行民朝夕不自保苟完今歲額幸矣何能及累歲之負身詣臺府待罪乃得緩迫入爲御史巡撫河南

朱廷益字汝虞嘉興人萬歷五年進士先是嘉定吏治操切富家皆破于徭役民多轉徙田爲墟葬廷益至巡行阡陌問民疾若以排年充糧長爲累罷之又地不產米苦于漕兌計議改折申揭上官題請得允又猾胥作姦錢糧徵比多所影射乃創爲鐵板冊三連票民間納戶始知所程任三年歸僦屋以居鬻田自給官至通政司參議歿後貧不能葬江南士大夫高其清節醵金助之



熊密字子縝廣安州人萬歷十四年進士爲人愷悌惻  
恤連值歉歲緩徵科以待恩命雖屢奪俸不爲之動時  
漕糧旣改折民非極貧下戶皆可任役乃採父老言以  
里甲編審民尤便之俗好鬪有名打行者盡置之法歷  
再考陞戶部主事

王福徵字星甫慈谿人萬歷二十年進士時漕糧改折  
雖已數年然尙須三歲一請福徵謂地不產米宜爲久  
遠計乃與邑人議請永折撫按具題報可折漕始爲定  
制陞戶部主事

韓浚字遠之淄川人萬歷二十六年進士爲政務求民  
便催科向以十日期會浚易之以月押班總甲悉除去

之有鄉民入市被劫不知主名浚訊知形狀曰此必某某捕至不刑而服募人墾荒三載後得復糧八千餘石又嘗濬河渠繕城垣修學校建明德書院以課士聘名宿纂修邑志後擢御史

陳一元字太始侯官人萬歷三十年進士歷四會南海令補嘉定居官廉恕明習吏事時戶部督促官布七年並徵一元以府部驛傳等可緩錢糧轉移辦解民免筆楚而程期無誤直大水躬歷四郊條上受災之數得粟賑濟必面給之民沾實惠邑賦歲輸十八萬量其緩急以次徵之衡法均平毫無羨餘民苦徭役多田之家有一歲充數甲者一元令一甲有役則餘甲無與一歲有

重役則餘歲無與于是中戶以上始不以多田爲患一元遇吏民一出至誠而人卒莫能欺其所論讞鮮有枉者未及三載擢御史

胡士容字仁常黃岡人萬曆三十九年進士性聰敏初下車盡悉時務緩急與一縣桀黠根株所在邑好訟輒以假命誣控士容真僞立辦僞者坐如律又同惡作朋以數十人訟一人株連蔓行因以爲例士容燭其奸使不得行任三年調繁長洲士民悲號送之在長洲聞嘉定事有裨民生而格于上臺者必代爲申請後官戶部凡嘉定以北運官布至京者必爲區畫調護天啟間部檄復漕士容陳訴其累戶部得題允復折爲薊鎮道以

不拜魏瑄祠逮問縣賍擬辟嘉定民醵金赴京代完瑄  
誅補臨鞏道旋擢太僕寺少卿

柴紹勲字鴻生仁和人萬歷四十一年進士涖任時歲  
祲賦急紹勲寬爲期限民不擾而賦亦辦催科舊有押  
班紹勲謂良民不煩逮繫頑者視箠楚蔑如一切罷之  
收頭尅納戶以自潤紹勲令民自緘入櫝使無所上下  
其手又懲訟師雍拳勇凡六載多善政

卓邁字真初莆田人萬歷二十三年進士洞知利弊銳  
意清釐錢糧向取盈于收頭而逋欠彌多邁比較排年  
人自爲計相勸輸納時布徵甚急幾至釀變乃曲意調  
停輸其半以甦民困五年擢監察御史巡按河南

謝三賓字象三靳縣人天啟五年進士政尚嚴察訟獄  
不越宿審鞠甫畢讞詞隨具吏民有違犯者不稍貸嘗  
角巾式四先生廬刻其詩文集當時稱文學吏擢御史  
歷官大僕卿按韓浚有治蹟謝三賓亦風雅舊志列之  
然其後韓卓附魏閣謝子福王時依馬阮晚節皆隳何  
即孔子論士首曰行已有恥洪範曰有猷有爲有守蓋  
人而無恥必至無所不爲而喪其所守如三人者殆才  
有餘而未開砥礪廉隅之道與故不削其傳而附論于  
此

來方煒字澤蘭蕭山人天啟四年進士任繼謝三賓嚴  
核之後惟務仁恕省詞訟勸輸將與民休息樂與賢士  
大夫晉接而風裁峻整人無敢干以私後陞吏部主事  
萬任字二懷銅仁人崇禎七年進士仁心介節見之躬

行不矜赫赫之名而執法如山莫之敢撓一日忽捕打  
行得若干人立斃杖下四境帖然時三餉疊加任憐民  
窮不忍獻朴自言甘以官殉任八年擢御史去

倪長珩字伯屏平湖人崇正十年進士爲蘇州府推官  
以才望著十四十五年閒江南奇荒朝議以軍餉匱缺  
暫復漕兌而嘉定又素不產米上臺謂非長珩攝事不  
可至則糧艘已入境部檄嚴迫而米石至五兩道殢相  
望乃悉心籌畫懇巡撫疏請以銀赴淮買豆麥搭兌于  
是折河夫捐美金並勸樂輸勉竣其事又擇士民赴京  
叩關得仍永折時饑盜相仍長珩攝篆六月鎮撫戢寧  
民得安堵後擢兵部主事改兵科給事中士民爲立報

德祠

錢默字不識嘉善人中丞士晉孫舉人柟子崇禎十六年成進士知嘉定縣有能名尋以南京失守棄官歸會柟以陳子龍及垢夏完淳牽連被逮死默削髮入黃山名成回字無知號霜華道人卒葬于雲門顯聖寺有吹簫草

國朝

唐瑾字雪靈光州人順治三年進士時兵燹始定瑾加意拊循遇士大夫有禮會 詔革明季濫徵請于憲府減本邑折漕銀二萬七千有奇上臺屢駁瑾力持之卒得減以憂去起補青浦知縣

劉宏德字馨若遼東寧遠衛人貢生意氣和平終日不見喜愠之色臨事決斷紛糾立辨微糧首創掛比法完納及額者免其赴比良民經歲不至縣庭盡革羨餘陋規濬河吏有以折夫銀進者怒治以罪自邑治至吳淞寶山各城堡及沿海墩橋皆爲修整會濬劉河與知州白登明區畫周詳民勤工舉有州邑雙清之號以挪墊銀兩被譴去民立祠祀之

潘師質字敏慎宜春人順治二年舉人蒞任不攜眷屬官舍蕭然日食粗糲時邑蠹導衛弁勾糧道經胥爲奸額外加漕耗若干民憤擊斃爲首者餘黨遂指爲知縣總督劾師質下按察使詰其事胥弁數窘辱之師質不



甘投秦淮河死有書繫臂極言加漕困民願一死以謝  
萬衆百姓聞者無不感泣已而御使交章論加耗病民  
遂得查減

趙昕字雪乘餘杭人順治十八年進士時適開劉河吳  
淞江昕躬爲督率疏通旱澇無虞荒田盡爲沃壤邑志  
廢久昕首倡編輯精詳識拔士四十餘人每月會課于  
春雨堂造就者甚衆

陸隴其字稼書平湖人康熙九年進士十四年蒞嘉定  
俗婚喪諸禮多效侈靡下令禁飭示以品制其爲政不  
拘于法以至情相感動市鎮少年朋聚以拳勇爲事廉  
其尤者責而械于門出入戒諭察其情色果悔卽釋之

役隸向以千計後稍稍易業去踰年訟者絕少催科立  
甘限法應輸者自限輸若干屆期及半卽得宥絕不用  
杖而輸者廩至性澹泊一介不取食米俱自平湖載來  
署中隙地種蔬婢嫗治織紉每公事出父老夾道看清  
官上官嫌其儒生迂緩誣以諱盜劾去之邑民填塞街  
道赴巡撫聲其冤乞留不得其去日也送者數萬人四  
方人士以詩文志之名公歸集後再起官四川道御史  
復以直言罷歸雍正二年奉 旨從祀文廟乾隆元  
年贈內閣學士兼禮部侍郎追謚清獻

間在上字爾達浙江山陰人由吏員任在事八年緩徵  
輕耗敢役慎刑諸務咸理縣自明定例折漕戶部執成

例凡蠲漕糧則以非本色不得預及蠲地丁則以屬漕  
項不得預康熙二十六年有 旨蠲本年未完及次  
年未徵地丁銀在上請命督撫一體蠲免始著爲例既  
而在上以他事罷奸民憾邑紳構大獄誣蠲免爲邑紳  
營請詞連在上刑訊問辟後贖免民立祠祀之

王樸字文重黃平州人康熙三十六年進士有文名任  
嘉定勵志以陸隴其爲法絕苞苴除坍賦葺學校立黃  
淳耀祠修復思賢祀典歲餘以憂去起補江西上高縣  
李士甄字繡紫榮澤人廩貢由西平教諭卓異陞任嘉  
定操守廉潔周悉民情邑故事胥吏司錢糧者歲有更  
代率多夤緣爲奸士甄從公僉點風弊頓清民得省雜

費供正額任二載陞主事

廖運芳字楚涯龍南人工詩乾隆七年進士任嘉定遇  
二十年偏災亟發常平倉積穀給之復請于上司得

旨賑恤又免是年例潞河錢勸富戶樂輸悉以買米  
煮粥活饑民數萬他邑重囚越獄遁入嘉定者悉擒之  
重葺先賢祠堂創應奎書院識曹仁虎于髫齡在任四  
年調繁丹陽將行嘉定士民爭作詩以贈之

介玉濤號徵齋解州人以拔貢生任懲竊盜教以營生  
其不改者峻法治之嘗居諸生于城隍廟後園讀書其  
中給膏火勤獎賞秦大成其所尤嘉許者也屢釋冤獄  
不畏強禦後調繁吳縣署太倉知州爲治一如在嘉定

杜念曾嵯峨人乾隆十七年進士莅任治民之闕狠者  
良民悅服移建育嬰堂而擴大之又重建當湖書院  
李仕清字逢源巴陵人乾隆二十年進士性和平恤民  
重士藹然有儒者風在任十餘載多惠政卒于官  
傅作霖南豐人乾隆三十二年進士作霖儀表不凡廉  
以律已仁以愛民培養人材輿論翕然推服

〔佐貳〕

〔明〕

王鐸榮昌人太學生寬裕明決民無隱情陞太平府通  
判歷戶部郎中交趾布政司叅議

龔麓蒼梧人永樂二年進士廉能有聲歷官兵部郎中

陞廣東布政司叅政

張鑑字廷昭上虞人由賢良任才識過人長于政事陞  
潁州判

尹正榮經人廉介強直管糧悉除常例豪民曹相誣其  
親屬爲盜逮繫獄一夕自經者十三人正攝縣篆鞠未  
死者二人得實置相于法後以考察去時論借之

魯邦木南漳人在任九年屢攝邑篆果斷通敏遇事立  
辨司巡捕鈎得盜魁餘黨不問邑絕萑苻之警

王治永平人廉而有幹畧一意奉公再署邑篆陞沛縣  
知縣

楊孟甫興縣人以清撿著亦不爲峻刻苛擾順民所欲

惡遠近悅服嘗署縣事同官有所請託強執不可陞藩  
王府紀善

趙任岳池人貢生携一僮赴任緝盜多方畧境內宵析  
無警嘗代同官視濬渠和平不擾民樂盡力會鹽道行  
部至蜚語劾罷之上民訟其寃不得白拂衣去

焦應鶴字蓬雪保縣人以拔貢來任時知縣萬任溫良  
樂易應鶴佐以斷制令行禁止鄉民斂錢演劇立撤其  
臺以修城上窩舖有弟訟其兄反覆論之其人感悟卒  
歸式好尋薦陞褒城令禦流寇有功擢漢中府同知

李玉森字木公高要人貢生甫至謁巡按御史于行臺  
長跪不稱大人巡按怒玉森極論大人名美而實未易

踐世俗不興之稱非禮所宜巡按晒而容之嘗攝縣事  
大得民譽後以兵畧改官將軍駐嶺表所學遂于易詩  
二經書畫俱可觀

國朝

殷相字元亮雲南鎮南衛人康熙間以隨征題補性廉  
介甫莅事吏以常例錢進相曰豈有官而斂民錢者撻  
而斥之嘗奉檄督濬河又攝縣篆盡却塘夫規例火耗  
羨餘毫不染指俸薄不能供朝夕衣服常入質庫署中  
隙地種瓜爲飯委解白糧貸七百金竣事後不能償旋  
卒于官邑民葬之皇慶寺東置屋數楹地一區以棲其  
妻子

以上縣丞



明

朱誠會稽人強毅有守爲黠吏所誣當罷知縣祖述力爲申雪復其官按吏罪如法未幾卒家貧幾無以殮述與僚佐賻之始得還櫬

楊衍銅仁人萬厯間由貢生任值海盜壞民田廬繼以疫知縣屬行視見所在蕭然道殣相望歸爲令泣凡發廩贍饑散藥療病皆身親焉邑困漕兌歲爲漕軍躑籍衍畢力捍衛旣改折嘆曰嘉定非此殆不可以爲邑矣後遷桂林府經歷

高宗永城人以貢生任職司水利先是吏多與塘夫爲市所落第修故事不足恃以灌溉宗至宿弊悉除溝洫

始治以廉幹稱在任三年屢爲上官獎許遷趙府奉祠  
以上主簿

明

陳訥靈壁人恤民簡訟以廉勤稱歷官高密知縣

鄧暹登州人歲貢生清苦絕人在官九年終始不渝及  
歸餽贐一無所受家居貧甚邑令延主社學

陳潔泰和人本宦族子贊政持大體知縣王應鵬深器  
之九年任滿以疾卒于途子德文官工部員外郎

國朝

閔有義孝感人順治二年七月髣髴令下鄉民未盡曉  
有義遍詣村落委曲諭之明年大盜越獄劫藏庫熱官

廉巡撫土國寶將發兵勦戮有義叩頭出血極言事由盜賊官斯土者不謹之罪民實無辜乃已邑賴以全四年卒于官旋殯南城

婁一夔字浩生會稽人緝盜安民監司知其能凡採辦白糧領解餉銀悉委之嘗解餉七萬至粵允餘三百金所司以私一夔却不受請文奉金還庫後協運至天津五壩俱凍遂車運進倉得不誤期考最陞鳳陽照磨後陞閔卿縣丞

何維增

人處事以謹厚爲心未嘗失職任事最久

始終一轍

以上典史

〔明〕

馮文魁字芝石錢塘人萬歷間官工部員外郎治光宗  
母皇貴妃陵與宦官抗左遷楚尉轉嘉定江灣司巡檢  
獻事多所平反能詩善書精篆刻善辨古人書畫著有  
元賞齋集 以上巡檢

〔教諭〕

〔元〕

蔣堂字子中郡人以孝友稱嘗從永嘉林寬學中泰定  
三年鄉試隱居教授受業者不遠千里而至至正二十  
一年用薦爲嘉定州教授

〔明〕

李惠字有孚甌寧人治身與其鄉林誌齊名舉鄉薦來

署教事方嚴自處拔才俊者居學舍給以膏火親爲講說一時人才若徐瑄潘暄范純皆出其門嘉定易學之傳實始于此迎父就養父樂土風淳樸有終焉之志歿因卜葬服闋補浮梁任滿還占籍焉

周成字朝美海陽人陳獻章弟子以舉人由歙縣訓導陞任集諸生肄業齋舍數省其私而詰責其惰者終日具衣冠端坐講論寒暑不輟嘗言男子冠則成人祭以報本世俗棄蔑古禮何以教人孝弟乎因圖冠祭二儀揭之講堂任八年遷國子助教上治安通義保泰安邦二策不報秩滿陞翰林檢討致仕

陳讚字允揚長樂人由舉人任學道蕭鳴鳳行部至稽

察士行讚所舉黜衆服其允狷介有守嚴于辭受尋中  
進士歷官貴州副使

王廷舉字心軒婺源人萬歷元年舉人性狷潔以實行  
砥礪諸士邑令熊密重之數諮以政人謂其與令暱將  
請託見其辭色輒慙沮而退陞國子助教歷博士監丞  
南京戶部主事郎中考滿貧不能具裝致仕歸

李吉安字邦瑞內江人貢生持身端謹言笑不苟時知  
府賈輿知縣洪冕皆其鄉人有誥于法者知吉安與知  
府厚密以五百金求解峻拒之求者益奉千金吉安怒  
將發之其人乃去陞某王府教授子充嗣巡撫江南官  
至工部尙書

黃虞字澹衷無錫人歲貢生勸課有方與侯峒曾修學宮又出已資以新廨宇巡按薦陞房縣知縣告老不赴出署日籍其所置門櫺樹木什物粘于壁曰吾不敢重煩後來者經營也

國朝

汪嘉濟字雨良吳縣人乾隆九年舉人十九年會試中明通榜以教職用選嘉定縣教諭循循善誘多士歸之是年災荒奉檄委同知縣廖運芳散賑明年春復主外岡粥廠經理盡善吏胥無敢侵蝕者以卓異歷任至貴州遵義府知府調大定所至皆以廉幹稱後因降調歸家至嘉慶元年卒年八十有四

直隸太倉州志卷十一